

आकाशवाणी

खास-खास खबरां:-

- प्रधानमंत्री नरेन्द्र मोदी हो'रें आखेया जे भारत 2 दहाकें थमां बी घट्ट समें च दुनिया दी 11मीं बड्डी अर्थबवस्था थमां त्री सारें शा बड्डी अर्थबवस्था बनने आली बक्खी अगगे बदा'रदा ऐ।
- भारतीय चुनां कमीशनर नै पच्छिम बंगाल दे जिला चुनां अधिकारियें गी SIR दे सरबंधै च लोकें आसेया जमा कराए गेदे दस्तावेजें दी 16 फरवरी तोड़ी जांच पडताल पूरी करने दे निर्देश दिते ना।
- 20एं मुलखें दे विश्व लीडर 16 थमां 20 फरवरी बश्कार भारत दी मेजबानी च होआ करदे भारत AI इम्पैक्ट शिखर सम्मेलन च शामिल होगंन।
- उद्योग मंत्री पीयूष गोयल हो'रें आखेया जे भारत-अमरीका बश्कार होए दे कारोबारी समझौते च करसानें दे हितें दी पूरी चाली राखी-हिफाजत कीती गई ऐ।
- पुलवामा हमले दे 7 बरे होने उप्पर मुलख इस काले ध्याड़े शहीद होए दे CRPF दे जोआनें गी शरदांजलि देया करदा ऐ।
- आबुधाबी च खेड्डी जा'करदी ओपन मास्टर्स गेम्स 2026 च भारतीय खडारियें मर्दे दी हैमर श्रो प्रतियोगिता च शानदार प्रदर्शन कीता- जेदे च किशोर कुमार चंदिरा नै सुन्ने दा ते महोम्मद अंसार नै कैऽ दा तगमा जितेया।

<><><><><><>

PM- ET Summit

प्रधानमंत्री नरेन्द्र मोदी हो'रें आखेया जे केई विघ्न औने दे बावजूद इस दहाके भारत च बड़ा मता विकास होआ ऐ। जंदी संजा नमीं दिल्ली च इक्रोमिक्स टाईम्स दे कुल संसारी कारोबारी सम्मेलन गी सम्बोधित करदे होई श्री मोदी हो'रें आखेया जे कुल संसारी महामारी दुनिया वैश्विक तनाजे- युद्ध ते सप्लाई चेनें च विघ्न पौने कारण दुनिया नै इस दहाके च बड़ा मता नुक्सान झल्लेया ऐ। मोदी हो'रें आखेया जे उनेंगी फखर ऐ जे इनी ज्यादा मुश्कलें दे बावजूद भारत च विकास दी गति बदी ऐ- जेदे कन्नै भारत दा लोकतंत्र होर मजबूत होआ ऐ। प्रधानमंत्री नरेन्द्र मोदी हो'रें आखेया जे भारत 2 दहाकें थमां बी घट्ट समें च दुनिया दी 11मीं बड्डी अर्थबवस्था बनने आहली बक्खी बदा'रदा ऐ।

<><><><><><>

PM -Assam Visit

प्रधानमंत्री नरेन्द्र मोदी होर अज्ज इक दिने दे दौरे लेई असाम जागंन। ओ बडुलै साडु 10 बजे डिबरु-गढ जिले च जरनैली सिङ्के दे कन्नै विकसित कीते गेदे मोरन बाईबास उप्पर आपात लैंडिंग सुविधा च पुजगंन-जित्थे ओ लडाकू हवाई जहाज माल ढोआई आले हवाई जहाज ते हैलिकाप्टरें दा हवाई प्रदर्शन गी दिक्खगंन। आपात लैंडिंग सुविधा उत्तर पूर्व च बनी दी पैहली ऐसी सुविधा जिसगी आपातकाल दौरान फौजी ते सिविल हवाई जहाजें दी डोआरी ते लैंडिंग आस्तै भारतीय वायु सेना दे सहयोग कन्नै बनाया गया ऐ। प्रधानमंत्री मोदी होर एदे मगरा गोहाटी च 5 ज्हार 450 करोड़ रपे थमां बद्ध लागत आली परियोजनाएं दा नीह पत्थर रक्खगंन ते उदघाटन करगंन।



PM- Hariyana e-Bus Sewa

प्रधानमंत्री नरेन्द्र मोदी होर अज्ज वर्चुअल ढंगै कन्नै चंडीगढ दे सैक्टर-43 ISBT च प्रधानमंत्री ई-बस सेवा योजना तैहत नमीं इलैक्ट्रीक बस्सें गी झंडी दस्सियै रवाना करगंन। प्रधानमंत्री ई-बस सेवा योजना केन्द्री सरकार आसेया अगस्त 2023 च शुरु कीती गेदी पैहलकदमी ऐ- जेदे तैहत सार्वजनिक- निजि सांझ भ्याली तैहत 169 शैहरें च 10 ज्हार बसां चलाइया जागंन- जेदी लागत 57 ज्हार 613 करोड़ रपे औगा। इस पैहलकदमी दा मकसद शैहरें च यातायात दी सुविधा बदाने दे कन्नै प्रदूषन गी चिगडा करना ऐ।



EC- WB

भारतीय चुनां कमीशन नै पच्छिम बंगाल दे सब्भै जिला चुनां अधिकारियें गी निर्देश दिता ऐ जे ओ एल्लै चला करदी SIR प्रक्रिया दे सरबंध्यै च कमीशन ते सुप्रीम कोर्ट आसेया लोडचदे सब्भै जरुरी दस्तावेजें गी अपलोड करोग। चुनां कमीशन नै ए साफ निर्देश दिते न 16 फरवरी संजा 5 बजे तोड़ी सब्भै जिला चुनां अधिकारी लोकें आसेया जमा कराए गेदे दस्तावेजें दी आपू जांच-पडताल करन। चुनां कमीशन नै अगगे आखेया जे जांच-पडताल मगरा जेकर कोई बी अनुचित दस्तावेज अपलोड हुंदा ऐ ते ओदे लेई जिला चुनां अधिकारी जिम्मेदार होग।

मुख्य चुनाव अधिकारी हुंदी अध्यक्षता च ECI दे पूरे बेंच नै पच्छिम बंगाल दे मुख्य चुनाव अधिकारी हुंदे कन्नै
वर्चुअल ढंगै कन्नै इक मीटिंग कीती जेदे च सब्भै जिला चुनाव अधिकारी मौजूद हे।

<><><><><><>

World Leaders -India AI Summit

अतरु 16 फरवरी गी नमीं दिल्ली च शुरु होआ'रदे भारत- AI इम्पैक्ट शिखर सम्मेलन च 20 कोला मते
मुख्य दे नेता शामिल होने जा'रदे न। 5 दिन दे इस सम्मेलन च शामिल होने जा'रदे प्रमुख नेताएं च फ्रांस दे
राष्ट्रपति इमैनुअल मैक्रों- ब्राजील दे राष्ट्रपति लूला डी सिल्वा- स्पेन दे राष्ट्रपति पेद्रो सांचेज़- स्विट्जरलैंड दे
राष्ट्रपति गे परमेलिन- नीदरलैंडस दे प्रधानमंत्री डिक स्कूफ- संयुक्त अरब अमीरात दे शहजादे शेख खालिद
बिन मोहम्मद- मारीशस दे प्रधानमंत्री डा. नवीन चन्द्र रामगुलाम- श्रीलंका दे राष्ट्रपति अनुरा कुमारा दिसा
नायके सेशल्स दे उपराष्ट्रपति सेबा स्टियन पिल्ले ते भूटान दे प्रधानमंत्री शेरीन तोगबे शामिल न।
विदेशमंत्रालय नै इक ब्यान च आखेया जे सम्मेलन च बोलिविया- क्रोएशिया-फिनलैंड- ग्रीस- ग्याना-
कजाकिस्तान- लिस टैनस्टेन सर्बिया ते स्लोवाकिया दे प्रतिनिधि बी शामिल होगं। एहदे इलावा एहदे च
45 कोला मते मुख्य दे प्रतिनिधि बी शामिल होगं। सम्मेलन दी चर्चा च संयुक्त राष्ट्र महासचिव ते केई
अंतराष्ट्रीय संगठनें दे अधिकारी बी हिस्सा लैगं।

<><><><><><>

Goyal -Rahul Gandhi

उद्योग मंत्री पीयूष गोयल हो'रें कांग्रेस लीडर राहुल गांधी हुंदे आसेया लगाए गेदे आरोपें दा सख्ती कन्नै
खंडन करदे हो'ई आखेया जे ओ इक झूठी ते गुमराह करने आली कहानियां गढा करदे न। श्री गोयल हो'र
राहुल गांधी हुंदे आसेया भारत-अमरीका बश्कार होए दे बपारिक समझोते दे सरबंधे च इक वीडियो दस्से
जाने दे परते च बोला करदे हे। उ'नें इनें दावें गी आधारहीन ते झूठा करार दिंदे हो'ई आखेया जे श्री गांधी
हो'र मुख्य दे करसानें गी मुमराह करने दी कोशिश करा करदे न। केन्द्रीय मंत्री हो'रें आखेया जे सरकार
करसानें दे हितें दी पूरी चाली राखी करा करदी ऐ।

<><><><><><>

Pulwama Attack

समूलचा मुल्ख अज्ज 2019 च होए दे पुलवामा आतंकी हमले च शहीद होए दे दलेर जोआनें गी चेता करदा ऐ। देश भरै च इस ध्याडे गी इक काले ध्याडे दे रुपै च चेता कीता जंदा ऐ- जंदू अज्जै दे रोज इक आत्मघाटी हमले च सी.आर.पी.एफ दे 40 जोआन शहीद होई गे हे। अज्ज उस हमले गी 7 बरे पूरे होई गेन। एह हमला 14 फरवरी 2019 गी पाकिस्तान आधारित आतंकी संगठन जैश-ए-मोहम्मद नै कीता हा। अज्ज उ'नें शहीदें गी चेता करदे होई समूलचा राष्ट्र नां छडा उ'नें शहीद जोआनें दी कुर्बानी गी चेता करने लेई उनेंगी श्रद्धांजलि देआ रदा ऐ- सगुआं आतंकवाद दा पूरी तगड़ेयाई कन्नै मकाबला ते एहदा समूलचा नाश करने दे धेइयै गी बी पक्का करा' रदा ऐ।

<><><><><><>

Open Masters Games

आबुधाबी च खेडी जा'करदी ओपन मास्टर्स गेम्स 2026 च भारतीय खडारियें मर्दे दी हैमर श्रो प्रतियोगिता च शानदार प्रदर्शन कीता। 30 प्लस आयुवर्ग च किशोर कुमार चंदिरा नै सुन्ने दा ते महोम्मद अंसार नै केंऽ दा तगमा जितेया। किशोर कुमार ते 37 इशारिया 9-2 मीटर हैमर श्रो करियै शीर्ष थाहर हासल कीती।

<><><><><><>